

天

一

閣

集

天一閣集卷之二十一

四明范欽安卿 著

藝文續稿序

某獲交於畏齋薛先生蓋雅所誦法也先生持憲
虔南遂納祿去某奔走中外已而歸田習嬾成性
不相聞問者二十餘年然慕義懷賢私心時嚮往
之間於士友獲覽先生藝文集因請卒業先生以
續集見遺某曰觀於先生之文而知道之相成也
道原於天而具於人心其存也渾淪而萬有昭融
擬之而不可象道也而莫非文也其發也充周而

觸機變化探之而不可窮文也而莫非道也故曰
三代無文人六經無文法蓋深於道而已聖學不
明異端蠡起乃若後世可異焉固有揣摩古昔高
談性命見謂布帛菽粟而實則猥凡施於清廟明
堂與章甫大烹並則駭矣其失也陋亦有陶埴萬
品巧擬雕蟲片詞隻字駕稱秦漢猶之土龍芻狗
將安用之其失也靡陋則使人長步濶視薄博文
不爲而甚且不立文字淪於佛氏靡則使人騁竒
鬪艷盡態極妍屹屹窮年而靡所底止斯二者蓋
岐道與文而二之也不觀之天地乎天道健而日

月星辰之麗。雨露雷之布。文也。地道順而山川
之流峙。鳥獸草木之發育。文也。故聖賢之學無動
靜無內外。一則純。二則駁。以此例天下之士。其將
遁乎。先生抱性穎敏。早歲蒐獵墳典。振藻藝林。顧
慮口耳無裨。取宋諸儒書讀之。證以孔孟。上泝亦
經推見。端緒已。又反求諸心。虛明冲默。窺見天人
之際。作爲文辭。直吐胸臆。所稱知行合一。動靜相
成。不一而足。如曰格物以致知也。致和以致中也。
問學以尊德性也。蓋內無欲以收主靜之功。不離
事境。不落言筌。於孔門博約。虞廷精一之旨。大有

發明若其品裁淡而不厭贍而有體卓然不詭於作者之塗視世所譏者霄壤矣故曰觀先生之文而知道之相成也稽之於古言道則文在其中河出圖而八卦列洛出書而九章陳是也言文則道在其中義以畫而易象昭禹以疇而民彝叙是也繹而思之端可識矣後人不察猥曰文以載道曰文者貫道之器彼固詞章流也子貢以穎悟稱於孔門其言曰夫子之文章可得而聞也夫子之言性與天道不可得而聞也猶不免岐而二之何歟其殆未聞一貫之前乎先生年逾疆心逾下而學

逾邃將深造自得底於醇大刊落枝葉得意忘言
則斯集者非先生之緒餘哉於乎覽先生之文者
可以道焉興矣

送王郡侯入 覲序

夫砥昭曠之節者不以隱微惰行樹閔遠之業者
不以通顯易慮故勲伐著於當年聲稱施於無斁
凡以敦純白而遠回罔也昔周官以六計弊群吏
之治善能敬正法辨六事亦足矣而必取準於廉
蓋士之持廉猶女之抱紩也士不才華而蓋其
汚女不以工容而贖其醜故勵志飭躬非庶不植

發謀播號非廉不臧詐聽別奸非廉不服回風正俗非廉不成一善立而百行從此君子居身之珎而亦守官者之要也何者化之有躐蓋者民也澤之有闕遏者吏也若其感召變悟之機類非彼之所能與蓋上者民之表吏之紀也余蓋數傷於世之爲治者東濕煬竈惟効鼠是效即閭里銖兩之姦無所遁罪民遂潛伏之不暇其檢飭門內類於除羊保群而狡黠之吏無能舞文亦且反面而易圖斯二者方諸避兔無爲者遠矣顧捐玉雪之志後羔羊之節决裂防維以明得意若之何求於人

者重而自治者輕也能無傷乎鵬江王公蓋古之
循良也以制科異等令建安徙閩縣治行焯著晉
司留臺疏論時政刺儉壬無所歛避已而出守吾
寧故瘠嗇荐懼倭警又歲比不登時稱難理公至
即下令曰吾奉

明命守茲土懼無術以佐吏民竊念弊亦叢矣釐民
間非難釐門內非難釐吾身難而今而後贖鍰必
貯於縣無敢私也常賦必按諸額無敢羨也堂食
必費諸吏無敢括也訊斷必傳諸典無敢罰也賓
客朋僚之交承必揆諸禮無敢媚且瀆也所不奉

以周旋者有如此日於是夙弊盡祛志行清澈用
能不令而行不嚴而肅豪右斂跡善良樂業民曰
是能父母我者也吏曰是能繩墨我者也僚案視
法而上官騰薦剡矣然則公遵何道乎昔鬪子文
恤民而貧楚成王每周之以祿必逃語人曰夫從
政者勤民以自封死無日矣我逃死非逃富也楊
伯起當密令之餽乃以天知地知子知我知却之
讀其書至今使人廩廩其在斯乎夫層冰積雪不
能墮其葉窮厓邃谷不能摧其色而榦明堂柱清
廟者斯松栢之操也蘊諸石則山坻輝蔽諸淵則

波流潤而下視瑚璉照乘後先者斯荆王夜光之
索也夫公亦若是矣謂之砥昭曠之節樹闕遠之
業者非邪乃今以述職行靡有所將宋人有言仕
朝者以餽及門爲耻任外者以苞苴入都爲羞王
端毅公嘗署諸門而于肅愍公清風兩袖之咏至
今頌之

聖明臨御百官承式遠則循賜金拜爵之章近則舉
錫宴褒詔之典舍公其誰位愈進則伐愈茂聲逾起
而且重諸無鞅可預占矣會郡佐諸君問言於范
子遂述以告胥曰是能識其大者遂書諸旌以爲

公先

贈見菴王大尹丞衢郡序

歲辛未見菴王侯以吾郵令遷衢州府丞民聞報
相率走會城乞留侯不能得已乃握符之任先是
進士補邑令有聲者入則爲給諫御史次亦不失
爲省寺郎蓋循習久矣外此則非常調而侯在吾
郵三年治行先他邑故說者謂侯不當爲郡丞衢
在浙爲中郡侯巨才不宜小畀余竊謂不然

聖朝稽古官人選任守令意在惠利元元長養休息
因之四境晏謐奠安宗社非苟爲一切之政而猶

士人便利之圖也

國初典章昭然具極

宣廟彌加興厲即郡守畀以重書行事不次登進迨於成化弘治之間海內烝烝號爲極治其後重內輕外而吏治亦頗尚苟簡計日望遷以得去爲幸鮮有惻怛子諒之實甚者且鄙夷其民矣嗟乎斯豈任人圖治初意乎

主上毅然下所司加意遴補惠至渥也衢當浙上流接江閩風氣相薄俗故稱驚悍適者蓋岌岌矣山寇侵掠警動遠邇至設臺使以控壓之勞來安輯

非淺鮮事也

上心軫念固欲得開敏疆毅之士秉純白有才行更歷世故者以相佐助民始獲有脫駕之期長顧逖攬挈以畀侯不既重乎侯精明閎爽足以應務強立不反足以鎮俗恭慎而脩潔足以裨身即所建樹已當於邑人之心稱不容口今固知侯之裕於治衢也春初郡國諸臣述職

主上甄拔茂異錫宴賜金其在任者以璽書褒獎亞躋通顯如

先朝故事蓋曠世再睹也侯行矣佇見治行升聞綜

核今昔且將召僕可束裝以俟矣

壽聞西川偕配陸宜人七十序

余觀上世聖哲卓詭之士起家建國雖用功能克
自表樹亦藉才賢子姓忠孝有行誼者盡精紹述
故道術爍乎光明聲施來世若高陽縉雲氏之有
元愷是已御世者遂用登延故伊陟相呂伋掌兵
權君牙司徒魯公分茅庾土鴻業克纂而王國亦
昌迨漢以來選用漸廣諸途並啓而任子得人自
蕭育汲黯馮野王肅玄成而下史不絕書若是乎
象賢者之有裨於理也西川聞公少即穎異讀古

人書嫻當世之務以莊簡公任歷仕都督宗人府
有聲用積伐晉禮部郎中涖中書科事久之加四
品服俸蓋出入交戟之內夙夜共事者二十餘年
靖恭慎密殆若一日當分宜秉政時嗣子勢焰薰
灼門趨若市公爲通家兄弟輒退避以是應得恩
數忍弗予暨其敗諸通好者例獲罪去公望顧益
起方期登進而公乃解印綬矣未嘗有不豫見於
言面偃仰林丘充養益裕陸宜人則又効內助今
歲同躋耆年華實並茂而公猶遜不敢居夫莊簡
公道德勲業巋然爲一代宗工海內人士無間識

不識稱賢公子必首曰西川西川云即未抗衡中
古回視蕭汲諸賢不既頡頏乎或曰彼揚自側陋
者何夫蘭蕭不同藝者其品殊也等瑟不同工者
其調異也故頌服詩禮文質彬彬則孔氏之庭慷
忼奮激慕義而輕生則田荆之俗退讓若無能悛
悛醇謹則萬石君之風凌潔俊朗弘通玄遠則荀
羊陳之致其常也若耕莘釣渭飯牛販繒崛起儔
伍之中翱翔青霄之上其變也常則一門八士不
爲炫世變則千里一賢猶比肩耳夫明月夜光孕
於清冷之淵純釣湛盧剗犀斷鵠之劍躍於歐氏

之冶豫章清廟明堂之具植於鄧林飛龍逸驃赤
兔紫燕產於月支大宛之域冀北之野夫物固有
然者而况人乎觀此則公之淵源所漸後先輝映
非偶然已余獲締姻於公覲聽甚習故推溯本始
而歸於善紹如此嗟乎若公者其誠才賢忠孝而
有行誼者哉遂書以爲贈

贈王郡侯序

鵬江公挺生南服弱冠登朝由南臺出守吾明余
時從士大夫後獲承風議而容睟然而氣充然而
神凝然頤然蓋猶麟鳳之翔遊而淵嶽之滄峙也

九月二日會公初度於是屬邑諸賢蒙成於公問
余以爲祝蓋亦詩人咏南山之遺旨也余曰若公
之壽寧當藉於祝乎夫君子出而應世伸縮萬變
患在於無開敏之才觸機酬物故動有所踈盪而
道莫能昌斯不足論乃若才既開敏矣而思或不
能退讓蟻矐天地糠粃古今睥睨姍笑無可當意
世且目爲狂恠而彼猶傲岸無忌如魏之楊禰唐
之四傑茲何能長世也夫退讓足稱矣而度或不
能安裕進有憤世之悻退有憂生之嗟幽鬱悲悒
出門有礙六合雖廣身若無所如賈長沙嵇叔夜

者流斯又何能長世也往余遊虔中會南來人習
聞公之賢蓋生即英穎異於輩流若劍之發劍驥
之脫馬尊公青蘿先生以理學獨行著當世過庭
之訓耳聆神會鄉中人士無不嘖嘖公者遂舉秋
薦計偕則又褻然南省已而歸山中三年養益完
遂遂令福建之建安閩縣皆有名稱徵拜南臺御
史風采凝峻所論列皆當世巨務及諸持柄有力
人無所遜避迨守吾明廉明公怒用是豪右斂縮
善良樂業有古循吏風薦剡交騰屹然公輔之望
公居之若虛未嘗有輕世傲物之志在明四年後

人多已遷轉公用前故遭迴衆方爲訝而公無幾
微見於言面綜治民務一如常日此其退讓之思
安裕之度無體交濟蓋不期於壽而壽可坐致矣
夫退讓則無上人之心而和平安裕則無矯世之
行而凝定和平而後氣不滑凝定而後神不馳外
邪退屏內景冲融將靜與陰同闔動與陽同舒雖
長生久視可也而何耄耋期頤之足計邪余故曰
無藉於祝也書曰天壽平格蓋以宅心設慮通徹
三極故畢公弼亮四世克勤小物而抑之之什衛
武公九十猶不忘國人之交儆蓋學愈進而心愈

下年彌高而德彌劭聖人純一不已與天同體故
先天而天不違後天而奉天時遵此道也若是則
壽又其至矣公以希聖爲期乾乾不息詎有滿假
余雖謂諸賢無藉于祝而又不能終已於祝也遂
書以諭之

贈王郡侯考績序

漢人稱太守吏民之本又云庶民所以安其田里
而亡嘆恨之心者其惟良二千石乎予誦其語未
嘗不想慕其人夫以闔郡之衆剛柔遲速異齊好
惡異慮避趨異宜所望於秉政者審時酌施順流

不擾大較不越二端儒雅所以飭治而忠信果毅
所以戢奸塗轍若殊道實相成故吳公文翁敦行
化導龍其黃勸課休養時稱治平而趙張三王奉行
六條䟽扶隱慝以寧民萌所居以赫赫之名漢之
循良於是爲盛斯難以軒輊論也書曰明作有功
敷大成裕非斯之謂乎然世罕通才以質性所近
爲治溫讓者畧於剴裁武敏者短於子諒論者蓋
交病之而治效亦遠遜於漢何恠也吾寧僻在海
隅當島夷內訌之後瘡痍甫起十室九空矯首望
治不啻大旱之霖雨矣我鵬江王公以名御史出

守被服經術敦行崇恪觀其條章所布先已後人
內詳外畧崇教化緩刑法廩廩德讓君子非所謂
以儒飾治哉然流風相煽鄙薄滋興甚者弱肉強
噬寡力衆路擅利角便廉耻道缺雖氓庶之咎亦
上人有以從吏之也公廉其故悉心振刷理之所
持筑獨必伸法之所麗高明不假期於祗奉典憲
整一風俗意甚鴻茂也民始而懾之繼而悔之終
則融融然安矣嗟呼公何以得此於民哉良由忠
信果毅有以服其心也用是薦剡交騰聲問逾著
茲以三載考績部民聞之甚恐相率徒跣累糧詣

臺司乞留公必得乃已此亦九畝之遺意也臺司
行當轉聞

上方憫念元元將舉漢故事遵

昭代之典璽書褒勵增秩賜金吾民獲有慰懌焉雖
然漢時二千石有治行者入備九卿

武廟以前太守徃徃內補卿丞如吾寧寇公其一也
然則公豈能久留吾民之所爲甚恐其能終釋乎
適郡僚段侯劉侯周侯謁余文爲贈余何能有加
於公本其行事敘論如此異他日傳循吏者當可
備采摭云

送徐別駕遷任序

今東南之郡稱艱大者非浙哉浙故以鉅麗擅海
內賢豪靡不願遊上焉者發慮展采施及幽眇爲
元元立命次則循理脩職亦足以致治蓋志易行
而澤易下究也自島夷發難吾寧首嬰其鋒流亡
相禪加以大侵歲所治戰守之具以鉅萬計仰給
縣官豪宄因睥睨其間怙勢干紀殆猶醜髀芒刃
之所不解柄政者恒患之而判也者所與先後贊
理而倡率宣導諸邑者也滋艱大矣於戲斯非才
敏純潔之彥其將能乎乃今觀於次蔡徐侯何其

冥契而有餘施也侯以宏達多聞用賢科起自南
服令桂陽遷判荊州再徙至今官所居以治行聞
而在吾寧咨諏民疾苦俗尚熾惡吏治所便不便
䟽剔而振飭之故發令布畫細大協於人心瀕海
諸倉奸豪窟宅擅不誅之日久矣侯不避險陋躬
親檢括盡得其隱匿以次釐正人甚便之迨攝吾
郵事平徭緩征簡訟清獄贖鍰之入以代公需未
嘗私一錢會藩司以督理漕舟難其人選而屬侯
侯遜避弗能得故事當此寄者恣所乾沒舟行率
臭厥載侯往來金陵武林之間庀材飭工越歷三

時心折力瘁舟成視舊甚堅且二百艘羨金以四
千六百計悉輸於公前所未有也臺省諸公咸才
之加禮獎焉乃今有桂林之遷郡中百姓聞之曰
是嘗父母我也士大夫聞之曰是嘗師帥我也五
邑之吏聞之曰是嘗倡率而宣導我也相率嗟惋
留之無繇觀是侯誠得志澤民不以艱大自畫彰
彰甚矣雖然侯蓋進於道者也有道者不以夷險
而動容不以淹速而易慮徃余叨撫虔南桂陽在
部中迄今蓋十年涉歷數地備嘗險艱非惟褊心
盛氣之人所不能堪即長孺嘆於積薪退之艷夫

二鳥侯顧舒眉暢抱較若一日殆非庸衆所能測
識余故曰侯蓋進於道者也一日具以告鵬江郡
公嘆曰侯蓋日替替襄我者也習知其政乃進於
道若斯哉行且有日請以斯言借諸僚贈可乎遂
不辭載筆而書諸旌

贈段郡丞考績序

國朝懸功令以馭天下之士倣自虞周考以三載稱
職者始敘陟之其侗儻瑰偉之雄及以他事左遷
論定者陟或年餘近更以數月蓋於品核調劑之
中默寓風厲裁成之厚沿習亦既久矣乃今斬於

天... 卷之二十一
蒙岡段君何也君少以竒童稱於吳楚間顧久次
費校嘉靖甲辰余備兵九江會蔡學憲道卿論文
首稱君曰是名下不虛者復十年乃舉於鄉又十
年始登進士銓授刑部主事主事平天下之讞而
又典 詔獄當是時

肅皇統天御宇廢置率從中制貴人復藉寵乘間毘
毘即善職者莫能持故值大獄人輒遜避不且深
文密網以遠禍君既敏果而又研精法比出則與
友僚叅訂下上其服一時稱文無害者必曰段君
段君於是君之名益著會柄政者脩故憾於重臣

風君傳致其罪侯弗應遂移於他官如所指君竟
坐是外遷入咸稱枉久之君始轉温州府判進吾
郡丞郡當海濱荐苦倭奴患君所典固軍政兼視
篆屬邑以身爲帥刻蠹䟽垢諸凡張弛協於倫要
往所稱狗偷之盜與虎視之胥相率歛遁民乃大
忻喜用是三年以績上於臺司臺司咸欲留君視
事如初夫以君之守官忤貴事久論定即使躋臺
省寄禁近猶以爲晚况佐郡治行復昭晰若是要
亦侗儻瑰瑋之雄何俟三年而復奏績非靳邪嗟
乎余知之矣君豫章產也不見諸豫章平當其抱

靈挺奇盤礴於穹厓邃壑之間齧之以炎曦焮風
剗之以層冰沍雪湍濤奔衝蛟龍窟宅蓋樵採之
靡及而道憇者捐之猝有明堂清廟之需工師且
將輕千里馬何則積厚者不可以淺施器鉅者不
能以小受殆有取焉爾由是推之則君之顯庸將
不在旦夕乎又何靳焉一日諭諸鵬江郡公暨諸
寮諸君咸曰是能知段君者因請以爲贈遂序之

贈劉大尹膺獎序

夫服官莅民者焉可以不自厲哉道之污隆者時
議之臧否者人而善敗遺取之則其機在我故志

士不以遠道輟圖蓋臣不以末俗墮節凡以締委質之分而樹飭躬之防也要其後輿論明而世道復君子勗焉而已

國家監古圖治推擇守令以寧民萌務得長厚廉靜之士脩飭名檢敦行教化夙夜孳孳以拊循嫗煦焉本用能因心爲政悃悃無華斯其最也其次奉法脩職亦足以致理乃其勸厲之柄則又寄之六察省方問俗旌別淑慝而銓曹之殿最

明廷之黜陟行焉延至成化弘治之間人競矜奮號稱又安其後道化陵夷流風相煽老成者謂之遲

鈍直方者謂之強復寬大者謂之闢茸退讓者謂之與懦薰蕕不分舉措倒植一時爭鶩進取而吏治亦頗趨文具師爲翕赫可喜之聲而畧於情實使人失其所持迨於今茲於戲時邪抑人爲之邪歲壬申鳴陽劉侯起自南服以令吾鄞鄞荐苦倭警兵賦蝟興瘡痍甫起日求康定服官者蓋甚難之侯至訪求民間疾苦施措所緩亟刻其煩苛以身先之務爲平易簡直之政不以私昵不以勢休浮俗所稱巧宦揣摩迎合鈎致籠絡之術一切廢罷直行已志斯亦締分飭防之雅致也夫寧抑情

徇外以徼非望哉乃今巡察豫章謝君會得代移
檄所司列其治行而獎禮之且以格於時例未即
剡薦爲解意深至矣佇見風聲雷動競奮良君
子有所恃而爲善細人有所畏而不敢爲非救寧
丞庶還於

熙代之隆可逆睹也若侯則以茂異之才當鼎盛之
年堅強立不反之志歷時彌久則治彌昌則譽望
彌熾嗣是巡察者且䟽具以薦

聖天子將脩累葉故事下璽書褒美置之侍從右地
圖惟中興端發軔於茲矣故曰騏驥之不蹶於羊

腸者其神定也夜光之不溷於廣淵者其氣溢也
治行如侯將不得爲志士蓋臣乎哉夫服官莅民
者之不可不厲也用是應邑寮諸賢之請且以徵
於來日

贈段都勻序

蒙岡段侯以才賢佐吾寧踰四稔將報政監司因
議留既得請民咸欣欣喜居無何會都勻守缺
銓曹以侯名上復報可民復相顧私語意若不
喻者范子聞之曰嗟乎以余視侯之行

主上德滋闕遠矣分方者極患之殷宰治者慮變之

豫然非侯莫或戡之夫天下大勢若居室然京師
堂奧也諸藩門戶也戎狄蠻夷近則唇齒遠在荒
漠之外藩籬也治雖居重以馭輕強幹而弱枝然
一指之不仁則恫瘝在身木蠹其外禍且浸於心
腹是以君子貴於炳幾而善制變也炳幾則能逆
其微善制變則可以御諸不窮非天下之智且勇
者不足以與此試觀宇內比年所稱侵軼中外震
懾者非比虜與南倭乎虜今已款塞稱臣著倭奴
爲患五寧寔當其衝幸蒙

廷議命將視師廓清氛祲簡任子諒才敏之莫起淵

憊而拊循之察其情慮與罷其所便不便然後瘡
痍獲甦流移來歸士旅精彊鼠竊屏跡若侯者斯
其選也然視諸都勻可例論哉都勻本西南夷地
介夜郎牂牁之交晉宋始羈縻之

國朝神武天行更衛爲府總統氓庶宸帶羗夷蓋亦
一雄郡也顧生苗接壤時懷寇突宣慰安氏席累
世之富強恣睢驕怙漸有輕中國之心識者蓋私
憂之何則倭奴越在海外出沒有常其迹顯而易
防諸夷肘腋連比志慮不一其幾伏而莫測如此
者乃若監司以一方爲心計在吾寧侯以留鈐曹

以天下爲心計在西南侯以遷事若殊轍而意切
謀國故曰分方者拯患之殷宰治者慮變之豫也
主上龍德統天苞育萬象乾旋坤幹神而不宰可留
而留可遷而遷期於救寧元元統一區宇故曰德
滋闕遠矣嗟乎士懷一飯之遇且不敢忘侯將何
以效報哉余諗侯忠亮天秉志在康濟必將審幾
酬變飭舉內治恩威信義漸被殊俗逆折奸萌而
感發其慕化之心拱手受命四境按堵隱然爲西
南長城循之吾寧藩籬既固而門戶堂奧交蒙其
成仰荅

主上簡畀之厚庶幾無負蓋合智與勇而時出之所
謂非侯其就戡之邪聖作法贖效法百姓囿法夫
何不喻之有適象山尹陳君過余圖所以爲贈遂
彙括其語著於篇

贈周司理考最序

國家加惠元元鑒觀古昔操三尺以劑量庶獄禪
輔教化意丞丞厚也責在西曹外以昇觀察而尤
慎選理官聽庶民之訟而質其成聲蹟著者往往
陟臺郎給舍列交戟之內持文墨議論爭可否蓋
秩散而寄鉅若此矣歲辛未吾郡司理缺天官選

以屬耿西周君當是時官曠者迨暮告牒放紛囚
繫積擁閹望見天日期以釋構舒憤者不啻倒懸
已也君至三月而獄清訟理茲歷三載當受署上
天子考郡大夫周公暨諸君屬余言余顛陋將何以
得當於君顧署必有稱試就所睹記者而揚權之
可乎皆曰諾曰自明允式敵之風衰世所稱吏察
以爲明刻以爲能若燭淵魚束濕薪恣行曾臆土
苴其民而靡所矜貸誠何心哉君神情宣朗幽隱
畢晰五辭盈庭徐以片言折之抑首稱服乃躬治
獄辭情理委備如漢廷老吏至奉部使者檄視列

天一閣集 卷之三十一
郡善敗耻事朘削以趨時好古稱文無害者庶幾
矣其以是爲君署乎諸大夫皆曰未也士之於官
也猶處女之於家也簠簋不飾則官方闕閭闔不
閑則內行隳何者官以正人非正於人者也當夫
墨柄政士鶩於進取羔羊之節畧而不論比者

主上力懲徃愆大計郡吏以風厲天下莫得浚潔寧
靖之士以佐民急顧可稱德指者何僅僅也君敦
尚名檢茹淡服䟽避遠垢膩門庭如水即常祿歲
入之外不加毫末雖蒙被光榮較若儒素清望四
播不謂倖已其以是爲君署乎郡大夫曰未也禁

乃肅容起曰治無體以道爲體亦無用以道爲用
故遊孔門者黜桓文宗孟氏者卑管晏蓋決擇邪
正之途而澄融諸心者也夫運才情任質行漫渙
焉而不本之學術將吏爲俗吏儒爲陋儒其能臻
於大猷乎君天稟沉默中鮮外慕頗聞早年綜攬
六籍寤寐周孔獨觀昭曠之源若有冥契焉者用
能斂華就實逡逡醇謹身不勝衣言不出口蓋浸
灌於道義而發揮於事業章章若斯之盛也以是
爲署不亦可乎於是郡大夫俱灑然曰采名稽實
必抉其微此誠取西君之所居也署當莫先是請

書以諭之

送王憲副之蜀序

鵬江公由名御史出守吾郡越四年矣會四川按察司副使缺

上俞銓曹請以公往蓋專董戎政云諸博士暨弟子負聞之儼然造范子曰公乃蒞蜀邪海內蓋多故矣惟蜀稱獨完吾曹見公神識宏遠濟以敏毅純白諸所施措務在敦舉條章以寧民萌聲問燁赫部使者時以轉聞投大遺艱宜無不可而乃畀諸蜀猶以湛盧刺豚侏儒委豫章非其理矣且公家

南粵去蜀殆萬里太夫人春秋高即奉以周旋寧能免於內顧夫審官視才體下則恤其私公乃蒞蜀邪范子曰余聞之圖大於細圖難於易蓋酌幾也人之情營目睫而畧諸遠禍害是亟而狃宴安鮮不貽悔子亦知蜀乎南控蠻獠西搃氐羌表以瞿唐叩峽枕以褒斜劍閣居嘗易動甚則擁兵自擅莫之敢問曩歲鄢藍發難中外震動至老師易將數年而後底定其中則沃野千里號爲陸海民殷國富無求而足夫民殷則習爲砮寇偷生而緩急靡可恃居嘗易動則取應倉猝而潰爛莫之能

支非命世之才明炳幾先繫何哉之計在飭兵邊
帥簡教專精勤施威畧陰奪其氣斯有永安之期
事固有迂遠而切於情實運量於几席而遙制萬
里之外殆此類也况丈夫墮地志在四方既委質
爲臣身非已有險易適遐伸抑淹速之筭寧復嬰
心蓋不欲以私滅公情犯義古人叱馭絕裾意或
有所指也公忠亮天植籌之已熟又所董惟戎政
蜀非公將疇昇乎雖然公豈久於蜀哉非試難不
足以有鉅非豫變不足以應世帝王知人之哲與
官人之能交相濟也公今發謀布慮默符機宜振

飭內地逆折奸萌上抒

主上西顧之勤時方弘纂令緒儷美周宣聞則必舉
故事酬公召虎南仲經營四國仲山甫典司政本
次第踐歷良權興於此矣諸博士暨弟子員懍然
曰即如而言蜀誠非公莫往矣請持此以諭諸公
何如余遂不辭而言

天一閣集

卷之三十一

廿

天一閣集卷之三十一

天一閣集卷之二十二

四明范欽安卿 著

劉觀察出師圖序

浙以東宸帶滄海當倭奴出沒之衝

高皇混一函夏北起渤海南迄瓊廣所在列城布戍
峙糧繕艦延亘萬里以備倭名勢若常山之蛇而
尤加意吾寧海山居民掣置內地慮宏遠矣後更
董以憲臣爾書行事正嘉以來承平備弛倭遂首
犯境上南圻閩廣延蔓繹騷幸藉

朝廷寵靈將士効死力歷十餘年而後稍靖然猶不

解備也歲癸酉見嵩劉公以名御史積閑來視事
悉心經畫起仆條蠹威聲達於海島烽燧不興說
者因謂募兵戰艦當裁省而輕銳牟利之徒倡言
海上金塘大榭諸山聽民墾田歲入可數十萬以
佐軍興業已議行公爭之疆曰某嘗籌之熟矣夫
海警猶疹瘡然善理身者不以疾間而已攝善御
變者不以患輟而弛防今雖幸謐顧戒心叵測又
閩廣積被兵浙稱稍完胡能保其無犯夫不能制
命萬里之外而欲懈一日之備兵艦寧當省邪
高皇惜民重土乃捐膏腴之地長慮却顧宜有大不

得已者以倭也土既就墾不幸而寇竄據入其中
更出迭入且耕且戰東南詎有稅駕之期計懷桑
土誠罷舉便主者遂不能奪明年春公乃擐甲提
兵躬臨海上部分諸將整舟師結爲五花之陣魚
貫而進旌旗蔽空戈鋌炫日瞬息乘風千里一壑
觀者環堵疑若從天而下蓋自耀兵以來未有若
斯之雄也居無何謀者稱倭自對馬諸島西向公
即督裨將徐景星於浪岡洋馬自道陳應良於陳
錢洋授以機宜各逆戰而叅將艾君升寔帥之攻
其中堅以音兵逸出其後賊大敗俘馘以數百計

餘悉溺海無筭班師凱至公於是是有侈伐矣艾君追敘前勩以出師繪圖某披覽之避席而言曰嗟乎余觀於是而知公之有五善也何以故四郊多壘厚在大夫自倭奴發難當宁拊髀思賢延攬群策宵旰不遑期以保固金甌斯亦主憂臣辱時也乃今露布四馳奏凱稱慶足抒南顧之瞻端撫穆清社稷之隸公寔尸之此翊國之忠也善而弗彰盛而弗傳以乏先後者耳公尊君一巖先生以浚德直節名青瑣已又藩臬吾浙憲風采疑峻貪墨解綬積官至大廷尉民到于今思之庭訓之漸

固宜光紹令聞是父是子常陳不得擅譽矣此承
家之孝也小人何知蒙其利者爲有德民間積苦
兵革瘡痍甫起杼軸猶空一聞砲鼓之警束身侍
斃今幸保有室家流移來歸飲水知源緊誰之賜
此拯民之仁也語有之謀大事者不計小費務遠
畧者不營近功蓋自古然矣藉今如彼議將使敵
入國門倉皇治戰險阨必爭之地拱手授人是猶
以空拳搏虎藉寇兵而齎盜糧也寧當首鼠兩端
悔醫噬臍昌言力爭不爲亢矣此圖事之哲也三
軍之命懸於一人勝負無端呼吸立變彼且狃於

嘗勝豨突狼噬巨海渺漫難以爭鋒行百里者半九十誰能長駕遠騁功收一戰公以偏師挺前決策制勝曾無一鏃之費先人者有奪人之心是矣此克敵之勇也謂之五善不既信乎雖然此特就公之伐而竊論之者如此若夫請劍之節埋輪之風海內紳綏猶能縷舉以爲法程固自在也余復何言

贈劉大尹考績序

我國家混一函夏綏乂民萌首在慎選守令以填撫之而猶委重於令凡教化賦役獄訟兵農諸

務不啻蝟毛胥倚以辨以故至川湧則難給刑
格勢禁則難施而胥吏窟穴爲姦利又故吾之所
未嘗則難裁乃欲以一人之智慮兩耳目之聰明
交承其間曲而中善應而不窮佐民之急以稱

德意蓋非忠信爲質順事恕施未見其有濟也吾郵
褒山帶海土瘠物詘民終歲盡力南畝以供官家
什一之賦鮮有積藏顧以醇簡稱比年則習爲澆
鄙浮侈而又飭治倭備無寧日供億滋繁至不堪
命識者憂之亦惟賢令是賴耳

明興有聞者具載往籍邇則曾吉水劉大名徐永豐

猶爲人所頌慕雖其寬嚴異體張弛異宜而歸於
憫民疾苦興利祛害則一而已乃今睹吾鳴陽劉
侯起家南海以名進士來宰吾邑始至民頗疑之
未暮月民畏之迨今三年而民且喜且譽不容口
蓋鄞俗負氣尚勝率以睚眦之忿相告訐詭情飾
貌莫知端倪侯剖析枉直錙銖不爽故民胥服侯
之明豪右稍驚聲利事陵轢民至無以爲生蓋亦
寬髡之所不解者侯檢以法理無所假貸故民胥
服侯之介世之巧宦者迎合時好矯以爲廉刻以
爲能競務虛恢以博浮譽即越理拂常亦所不辭

侯直道而行弗激弗隨故民胥服侯之定人例視
官司爲傳舍以不事營繕爲賢侯嚴內外之防飭
正門宇慎愆庫獄增庫拓隘劃然一新費皆取諸
公羨無科於民故民胥服侯之弘若此者遵何道
邪吾聞侯嘗謂人之喜怒毀譽吾不恤所自信者
吾無欲害人之心自持蓋已素審及薦南宮今元
輔寔主試事迨旅見屢以正直忠厚爲訓寧拙毋
巧寧遲毋速淵源之漸又有自矣要之亦豈外於
忠信爲質順事怨施已哉茲以考績當詣天曹吾
民方懷借寇之勤時又值水沴亟望撫綏當道必

舉時例爲民奏

請留侯矣易比之初六曰有孚比之無咎有孚盈缶終來有他吉比道終始一字也侯不鄙夷吾民永肩一心以攄斐忱不惟儷美昔賢他日荐歷通顯弘濟元元良權輿於茲矣遂書以俟之

壽屠夫人七十序

范子曰女德之繫於人者豈其微哉蓋亦有交脩之助風厲之益焉猶之水火濟則化理調型模正則器不苦窳閨閣之內斯人倫之端道化之宗所藉以承輔夫子飭成嗣胤者也三代之興王靡不

率是而况於人士乎余嘗誦詩至關雎麟趾膠木
鷄鳴等篇未嘗不擊節嗟嗟以爲世道休隆教化
宣鬯往往見諸行事論議即漢以前如魯啟姜衛
定姜齊虞姬晉羊叔姬臧孫田稷之母僖負羈老
萊之妻左右長育其聲績與孟母樊姬輩後先奕
映即其貞靜幽閒莊懿恭順之風可以想見斯誠
士女之芳躅彤管之令範也乃今觀於屠夫人何
其大相埒邪夫人生自華閨夙閑姆訓早歸司馬
竹墟公稱能翊贊以賢德聞嚴事大夫人惠及庶
媵旁逮姻族無巨細皆得其所公遂自郎署躋列

卿別歷中外迨謝事於今五十餘年以勲業名行表儀海內居嘗逍遙物外觴詠爲娛門內祭祀賓客勞頓委瑣諸務一不嬰心顧井井有緒良以夫人爲之地也嗣子比部君清脩雅飭嗜學績文悛悛奉訓令惟謹比就官兩月即予告歸養出入必請命而後行一時稱賢公子者必曰田仲田仲斯則夫人教化之漸淵源非一日矣禮婦不踰閭無非無儀惟酒食是議詩之教若此矣循外可以占內標顯可以晰微信如筮龜捷於影響由今觀之交脩之助風教之益儷美昔賢風示將來不既可

推見邪余弱子大冲以子婿嘗奉起居習聞諸懿
每舉以爲世程益可徵矣茲屆七十初度之辰諸
子婿毛子聞子以言見屬遂爲推本其畧如此繼
之以歌歌曰有鵠有鵠兮頡頏雲爲衣兮霞爲裳
下上莽蒼兮攬四方相康樂兮樂未央又歌曰猗
鳳凰兮鳴朝陽毛羽燁燁兮五文章乘隆運兮明
昌薦燕喜兮左右相將又歌曰陽烏月兔兮耀精
芒西嶮嶮兮東扶桑挾赤松兮王母行胥盤礴兮
萬壽無疆

贈莘野周郡侯考績序

莘野周府君視府政且三年矣當以最上屬邑令
劉子輦授簡於范子俾敘列其治行將懸諸旌以
爲計曹先某曰余何知哉余好覽觀故事班孟堅
傳循吏龔黃諸賢皆率先醇謹務在廉平退讓以
綏民萌所居雖無赫赫名顧民號大治乃若趙廣
漢張敞輦習見俗尚之偷畢智殫慮期以振起敝
陋民亦惴惴奉法改易觀聽非不稱也顧不得與
循良並論何哉無亦以烹鮮貴在不擾而大絃急
者絕小絃余自叨任使遊行幾周天下所睹郡國
大較希慕趙張輦爲名高乃龔黃何寥寥也余郡

當吳越之吭控扼東夷稍有警吳越即交臂失色
蓋儼然一重地也民間故熾嗇積苦兵燹所稱軍
旅防戍艦械供億諸務奔命不支尚冀湏臾無死
保有室家田廬不啻饑渴之飲食焚溺之於拯援
也

皇上開天域民鑒觀宇內屬之府君時前府君猶未
他注也迨府君至庭見父老詢以疾苦政所便不
便狀曰民之難阨若斯乎是長民者之責也成大
勤者不急小公務遠畧者不牟近利亦惟簡靜不
擾而已乃敦持大體專務休息去苛急罷搜剔解

紛糾䟽滯積汰深文之吏懲恣睢之豪以意行之
無所眩飾蓋榦之以雅飭敷之以慈仁濟之以明
達而優養之以和緩較然可睹矣茲報成也

皇上方紹續鴻緒綜核名實往年獎進英乂賜金錫
宴意甚深厚矣不知其人視前代何若以府君視
之不知又何若府君秉心敷治且置趙張輩不爲
皇上從而廉核之獎進當又何若邪抑將徇民之急
增祿加秩俾仍視事邪吾民沐浴膏澤惟以府君
亟去爲念諸君子奉令承教恃以朝夕無恐宜乎
尤不忍釋若此也詩曰無以我公歸兮無使我心

悲兮民之心也又曰晚見君子我心則休諸君子
之心也又曰言甫作頌穆如清風余方有志焉而
愧未之逮將何以慰民將何以應諸君子又將何
以爲府君重也余不惟愧且滋懼矣願諸君子持
而揚摧之

贈一川游郡侯序

昔人有言三代之民制命於君其後制命於天竊
嘗疑之天祐下民迺作之君計在奠綏自王朝下
逮郡國其責維均故綏在王朝王朝即三代綏在
郡國郡國即三代矣天何云乎及觀漢世惠養元

元政簡罔濶二千石又能奉法惟謹當其時衣食
滋殖教化風行要惟廉平不擾與民休息而已至
觀循吏傳僅僅前漢六人後漢十有二人所稱治
績赫奕如趙韓嚴張三王之屬不復偕焉將亦制
命於天耶五寧地濱溟海夙稱瘠瘠嘉靖中葉以
來島夷內訌孱嬰楚毒因之大畜容兵歲餉金穀
於常賦外殆三十年近復以災告

主上龍興軫念遺黎屢下寬恤之詔遂選擇太守得
吾一川游公公用進士高第官留都法曹以文無
害稱迨至郡開遼悃誠與民更始期於宣布德意

蠲除繁苛時嘗問民疾苦嶺山遐海皆得至前蠲
說審諦興罷如水利弭盜諸事纒纒稱便諸郡邑
歲輸軍需以鉅萬計靡得留難泊儀給戎行皆當
實無毫髮私以是懼聲彌道俗故喜訟日皆羅庭
下魚貫而進立爲訊決小大畢得其情咋舌不敢
出一語即負者退無后言已乃緣法酌擬務在輕
科薄贖船自裁定老胥無能上下其手曰公法家
也與客論事溫顏恬辭中若無抵逆至法理所在
屹然莫之能奪要之公惟端亮宏厚不設城府惟
以廉平爲本隨宜展措各適其則故能不嚴而肅

不令而威廩廩德讓君子也吾民喜色相告阡者
復起去者復還獲有乂安之望公之大造其視漢
代諸賢足相頡頏不既制命乎哉邑令朱君時嘗
過從曰某不佞筮仕茲土良有厚懼今蒙知於公
奉令承教獲可寡戾又有厚幸焉敢不夙夜以圖
無負於是公今初度矣朱君偕慈奉定象令支君
輦因謁爲文某非善文者第以報諸君且致吾民
之私云

寧波府水利圖說序

范子曰予按圖記邇古人治水之跡東南視中原

異中原河爲宗東南江湖棊置率委輸於海然溝
因水勢防因地勢期於善激善淫一也秦人不道
舉先王之法而芟夷之更爲阡陌海內水始多故
矣語曰周秦者古今之限也諒哉吾寧當揚州東
南取田故下下又地剗不合滷水易騰突緣是作
河渠爲水旱備惟碶堰是藉焉碶以疏水猶溝也
堰以止水猶防也畫之爲鄉注之爲溪爲浦爲港
豬之爲湖露之爲灘津涉之爲渡瀉之爲江而海
當尾閭焉皆水也乃猶量高深爲則以時蓄洩率
使土沃入豐昔人之猷述矣夫何世久法墮寢矣

故軌可嘒也少司馬蘇徐公奉

命保釐浙土悉心民隱會鹽官海堤成神人歆暢遂
屬藩叅閩徐君曰夫民也者天生之人成之王者
之天在民民之天在食水非食之天乎利之下究
惟守土責其行所部各條議可否將覈而興罷焉
而陳公方奉

璽書督厲惟謹於是郡太守游侯行視屬邑與各令
長求源委地勢險易硯堰善敗民便不便之故具
得其詳先是海憲荆周君守豫章本著圖說以上
公曰嘻斯殆予督撫江右時事乎報可之間以示

予周覽而言曰嗟乎水之繫於民者寧不鉅哉禹
周行天下敷土滌源惟溝洫馬力馴至四海攸同
下民其乂厥稱神已魏而下張渠決水其効至於
瀉滷稻梁頌歌迭起是遵何道哉利故也世人聞
於大較夙夜惟簿牒期會是亟覲免譴呵博時譽
足矣又何暇論於文法之外哉即有之鮮不目爲
迂瑣迺相嗤笑使人失其所持部使者亦復高居
養望督察風厲之法棄而不講曰吾以敦大體謝
苛細云爾欲使人吏奔命臻於康阜能乎我

明統一區宇所在專官董理間值重役授寄大臣若

宋公禮之於會通河徐公有貞劉公大夏之於張
秋夏公原吉李公克嗣之於吳淞江白茅港咸樹
有嘉績與宣房鄭渠者埒至郡邑號稱利濟者亦
一時之選綜而言之其要先於陂山開道邇求泉
源廝流股引俾各循其壑次之廣樹豐堤擁土甃
石用以渟滄深洪外捍奔濤又次之物土建礮廣
狹崇卑咸適厥中視則啓閉無澁無濫責在守者
而長吏又時行巡督程勤惰達諸部使者行勸懲
焉若今所講公之烈與陳公之分猷率屬利賴我
海壖之民者不既恢宏哉雖然善作者不必善述

圖始者不必圖終故君子弘於得師勇以赴會昌
明此政而已公今且應

召行屬關中李公代風望夙隆元元曠首稱慶所繇
弘纘令緒引於勿替將不在後之君子哉其不佞
爰即所睹聞者著於篇

贈朱大尹貞石序

貞石朱侯令吾郵之明年治通惠流譽亦丞丞起
巡鹺房公爰檄所部曰予按蒞茲土夙夜兢兢思
以康濟黔赤惟郡縣焉屬亦既悉心程核矣茲得
代遵

璽書率職者寢不率職者刺曷敢有決心惟是郵令
某其度恂雅其操端嚴而其政釐吏弊恤民艱具
有善狀與衆論協蓋褒禮焉人皆以爲侯重予曰
第諗之侯殆信於自考哉吏治且覃矣吾郵瀕海
民故瘠貧終歲惟力穡以應公私重去其鄉至有
不識城府者後寢失其初迨嘉靖中倭奴發難遂
治戰守備徵兵增賦迄今未解加以水旱頻仍民
不堪命所望於上人之援不啻水火也民間且習
爲徒史竒貨視官與民爲市因之哆談極慮舞文
鬻法以爲意得非賢而敏毅者鮮不受眩若是而

欲自售未能也康濟之謂何侯之莅吾也精研庶
務具得要領上下今昔而調劑之躬爲裁定臻於
法理兩造盈庭往往推見至隱閭里銖兩之奸無
能爲遁左右且持簿書供使令廩廩奉令不暇又
安從高下其手事漁獵乎居嘗咨詢疾苦往來深
山窮谷中觸冒暑雨了無倦色故零金沙池甘澍
隨車視它山東岡諸水利脩飭如法爭構者亦按
物面質竟得其平席蓋不獲暖也若是者良由君
恂雅之性端嚴之操以爲之本恂則不諼雅則不
鄙端則不佻嚴則不弛與道夷游以時出之宜乎

冲然而盜沛然而莫之禦其於釐吏弊恤民艱也
何有予故曰侯殆信於自考也夫治亦多術矣善
治者能淑人不淑於人善淑人者能力善使人皆
爲善要之神慮感發焮迅雷奮今浙之文武士吏
以千計靡不觀聽進止此風鼓動其善者曰吾幸
得儕於朱侯也其不善者亦曰吾亦爲人之上奚
不朱侯若也將使諉者恂鄙者雅佻者端弛者嚴
爭相濯磨期於大猷吏循其守民樂其業皆造端
於此矣語曰物不震不發士不激不勇殆此類乎
予故又曰吏治且單也人乃稱爲侯重侯顧假是

重邪大鵬搏扶搖而上九萬汗血之馬日行千里
斯豈有憑藉哉侯之才足以自致青雲躋於崇顯
茲不過爲衆人設耳故曰豪傑之士雖無文王猶
興予尚於他日徵之共會邑博林君董謁予言爲
贈辭不獲已遂書以爲序

贈劉建平上計序

正峯劉君令建平且三年積有勞勩明年屬大計
天下郡吏之期劉君當往余姻家包子方爲邑博
士問贈言於范子謂某等幸以職事蒙成於劉君
茲行睽睽不忍釋而劉君故江陵世家也性行淑

均精於經學與弟仲君以文名薦諸鄉久之乃令
建平建平當宛鄆山谷之中俗樸野無侈好顧後
禮讓善使氣爲理邑者因上官又不時至督察非
一日矣劉君至以身爲率崇飭繩檢輒詢民間疾
苦得其要領務在除去煩苛定繇賦簡獄訟崇正
抑邪脩明教化爲亟用能爭相矜奮習尚頓變而
尤加意黌校歲時督課諸弟子究析幽眇可可否
否靡不人人意滿以是芳問大著部使者交行褒
異蓋十餘舉矣斯非社稷之隸而人士之律令乎
范子聞之曰余嘗綜覽當世之故蓋有慨於理邑

卷二 夫令者元元之所倚爲命也今海內日滿且
德所望於上人者惟聚欲去惡更化善俗而已士
方平居多談濶視下上千古薄卓魯爲不足爲一
且入官遂棄去如弁髦斯不必論矣顧世所稱上
馬者崇飾虛恢改易觀聽以爲名高次則卑卑靡
所表見惟計日取資焉耳欲使身肩特艱拊循康
定前無營覲後不避委者幾何哉即劉君所施務
以實勝卒能革其故染此豈齷齪時流伍邪

聖天子厲志中興蚤夜孳孳思得賢俊共理往歲計

一吏遵

先朝鉅典燕錫駢蕃因以風厲意甚勤懋劉君茲行
當事者稽覈上請將不權輿於此乎所稱矐矐不
忍釋可畧矣試以詢諸劉君當謂何

贈少司徒新泉江公序

士大夫起而擅當世之譽豈徒計日取資哉蓋必
有疑定之守不可概之量與道浸淫出入不悖祿
爵不能縻禍寔不能怵故能任天下之重茂建勲
伐聲施後世何者其出之有本也

明興敦厲道教士務矜奮以名行相高其後頽風鼓
扇俗寢陵夷至嘉靖中葉靡靡難言矣即矯時獨

立之彥殆不能容呼可異哉某竊有感於新泉江
公也公以經術起家進士次第當內補持柄者方
以聲利籠天下士輻輳其門公朝省歸即闔門讀
書請謁一無所與遂出守安吉彼且得而甘心也
顧安吉以治行聞部使者疏十餘上久之領度支
郎積六年不調已乃典荊州廼翔藩臬間始正吾
浙轄一意治職業簡澹自將未嘗脩境外之交會
虔南督撫缺

廷議以公應過海上而決筴焉見公狀貌魁梧個儻
有大畧神融融爾慮深深爾洞觀時變披豁心膂

其曰公第往虔南不足治矣是時寇賊披攘撫剿靡定公延攬群策審量堅瑕一鼓而芟夷之事聞主上嘉勞茂錫衆咸嘖嘖也而淮徐之間方河決不可曹遂以屬公至則殫慮籌畫不憚以其身疏湮杜隙底有成績京餉數百萬於是直達而公之名滿天下矣試嘗遡而論之蓋有二難藩轄以前難在已督撫以後難在人倖門四闢競者蟻聚乃深念遜避斤斤自喜非不善矣猶慮忌者齟齬怙者恣睢進退維谷置身何所斯難在已也不幸而值山寇水沴亟圖康乂脫一不當變生呼吸百萬之

命歸不罹鋒鏑溝壑而旁睨者且議其後斯難在
人也乃公與時周旋各臻其効使非有凝定之才
不可概之量以爲之地將不免於隨世浮湛躑躅
險難安能淵渟岳峙若此之盛哉予因是有感於
公且謂有本也間以語諸郡大夫游君曰唯唯非
子莫知公且公年今六十矣某與都運許君某節
推葉君某皆姻也從而乞言可乎某曰予復何言
公之守與量固其所也夫守凝定則外無可欲而
精氣完量不可概則中有定主而神慮暢壽之道
也 以左右宣力則壽國以康濟時艱則壽民以立

身揚名孝思不匱則壽親和氣薰蒸後天不老皆
舉之矣予復何言於是游君曰吾且持而書之以訊
於公遂往

送郡侯游一川八觀亭

明年庚辰天下藩臬郡縣諸臣當上計於朝郡大
夫一川游公以先期往郡邑諸博士率諸弟子屬
以贈言某曰余聞善牧守者其道有二阜之而生
不匱牖之而率有常期於衣食滋殖移風易俗稷
契之守仲尼授於冉有非一日矣循之則治逆之
則墜有所參焉則駁道本相成而教猶艱大何者

遐邇異壤汚隆異俗剛柔遲速異齊古今異時而
張弛羸縮便不便異宜與道周旋斯稱師帥余未
嘗不拊心於世之君子也公之善政往嘗爲諸邑
令序次矣諸君典教第以教事論可乎於是合辭
曰蒙嘗樂有沾被而罕闕其際試言之猶慮蠡之
測海而爝火之狀列宿也公純懿天成志慮疑定
出繩入矩畧去鄙近蓋以身爲率未嘗見有叱咤
之語簡亢之容時與諸生抑首滌心緝緝而嚮風
猶廣厲學官之路歲時程校藝文敦正雅體上上
下下各適其品而尤崇飭名檢達於所司獎進者

若而人汰去者若而人當大比先後搜揚不遺餘
力民間童儒且越格推拔竟獲其請蓋列郡所未
有也既而諸雋並進皆名下士公之德施汪洋嘉
賴吾學者亦甚章章矣他如節至而賀丁戊而祀
大旱而雩存舊而恤秩賓飲而延容使之類感勤
誠祗恪不以早夜懈不以顯晦殊所由裨輔教化
興起士行者纒纒莫紀故曰樂有沾被而罕闕其
際也若此矣某廼作而言曰嗟嗟盛甚我將不得
爲良牧邪三代而下漢治最爲近古所稱循良皆
以儒者通於世務以經術潤飾吏事廩廩有德讓

君子之風者又...
岑之於桂陽山陽皆能治行崛起聲施後世若公
者庶幾哉

主上銳意中興臨軒受計將按往年成典下置書褒
美錫宴晉爵可想見已雖然海隅士民方沐浴膏
澤望見旌輜相率喁喁如赤子之戀慈母懼不終
惠詩曰無以我公歸兮無使我心悲兮民之心也
又曰既見君子我心斯休諸士之心也又曰適禾
之館兮還予授子之餐兮鄙人之心也嗟嗟公將
何以爲心哉

贈黃總戎移鎮廣東序

方今宇內又寧羗胡款塞所稱易動亟在制馭以備非常者非東廣哉東廣跨有嶺海山谷深阻入雜夷獠積狃輕悍其勢然也當倭奴雲擾侵剽亡筭廷議命將督帥積十餘年而始解嚴然不弛備海以外西南諸夷歲函賫貨乘巨艦入與官爲市內地以漁食爲生稍不愜稱兵四掠急則結遠夷倨強山海間如張連林道乾之徒非一日矣蓋繇地壤懸隔京師事猝莫得聞易於掩覆所在又多跡寶奇姪之物仕者鮮不櫻情貪懦成風馴致

法令之抗尚存
聖天子鑒觀往事拊髀已久屬總戎缺迺移吾浙西
湖黃公往秩不加舊而寄畀重矣走聞之曰東廣
不於是按堵哉公家世將種用詩書韜鈴舉武科
上第歷邊塞吳粵以至今官勁勇廉肅之名習聞
海內先時莅吾浙者自俞朱二督府外鮮可人意
大較巽軟偷惰諛媚苟容甚則恣意掎事權下
移而且創祠樹碑以塗耳目欲其弭外戢內能乎
公至即按故事敦正大體有不率令者疏論報罷
行間乃始知有闕府因而簡士伍飭戰艦謹烽候

慎間牒無問織巨井井更新而服食交際務簡澹
如寒畯不敢私士卒錢一物時當防汛躬涉大海
揚兵厲士夷迺屏跡遠遁今已三稔斯廉勇兼資
之効也廉則志行峻潔而不妄圖勇則神虜精強
而不隱禍聲聞四達旌麾改色內以消其桀驁無
聊之心外以杜其觀變搆亂之釁雖稱易動且將
降志抑首望風效用以戰則勝以攻則取其於東
廣按堵也何有

主上制勝邊陲越格酬勲即遼陽大同諸鎮以首虜
上輒降勅錫服封伯晉孤所以寵異風厲者其厚

此千載一時也
以同事之好問贈言遂序次其事爲公預筵如此
詩有之文武吉甫萬邦爲憲公尚勗哉

贈李郡丞擢守高州序

象台李君佐五寧之六年會大計以治最上廼擢
高州太守聞者交口稱得人余因展慶焉李君曰
福生有階余將何以戲之自佐政來鰓鰓期不負
茲幸免於吏議顧獲有此擢肩重者蹶陟高者眩
惟惴惴懼焉夫何故崇卑者秩也細大者事也要
散者寄也險易污隆者勢與時也而善應之者人

也太守吏民之本鈴轄郡邑以司倡導故田野之
欲其闢戶口之欲其贍賦歛之欲其節費校之欲
其興章程之欲其一訟獄之欲其平攘竊之欲其
戢力役之欲其簡斯庸以飭吏治而遂民生也今
舉而昇諸一人之身体戚善敗胥是焉繫不既艱
大乎哉余往之所隸者惟戎與盜戎清之而已矣
盜弭之而已矣猶復夙夜在公慮無安暇今秩雖
晉而事寄不啻倍徙於昔况高涼當南粵之委去
中國遼邈被山帶海夷獠出沒非常公私交困殆
不堪命今茲之往似猶理亂絲烹小鮮如之何甚

不懼也余曰善轍者不更軌善治者不易民非以
綱張而目可舉領挈則喪自順乎君之爲佐也受
成於守雖神應無方伸縮可否有難以直情者寧
免心膠於苦而事掣於行乎若守則臨之於上揮
霍之於左右以戎政則畀諸丞以賦歛則畀諸別
駕以訟獄則畀諸司理以章程則責諸幕以黷校
則責諸博士以禁戢則責諸司廳以出納則責諸
倉氏庫氏畫之有條會之有要佇見以簡御煩以
逸制勞身不越庭戶而化行千里之外禮讓遵循
風俗醇美其於治也何有君佐吾寧持以廉靖寬

平六年迨一日頌聲溢於口碑薦剡騰於直指致
有今日非偶然已胡言懼也雖然天下之事何嘗
不成於懼而墜於玩也懼則情氣奮不以艱阨懼
則善心生不以物淆夫谷之所以傳籟者虛也海
之所以爲百川王者下也懼之道也行百里者半
九十吾知免矣是以爲君慶也適諸郡寮屬以贈
言因爲揚摧之如此試以諗之他日其以余言爲
不佞哉